



aktivis lokal

gwoup aksyon kominotè

sipò

Nan faz Sipò a w ap kontinye travay avèk Gwoup Aksyon Kominotè ou te idantifye nan faz Konsyantizasyon an.



Aprè w gen tan konsyantize yo sou kesyon pouvwa, vyolans sou fanm ak VIH/SIDA, kounye a w ap kòmanse ogmante konesans, kapasite ak resous gwoup yo pou yo ka bay bon egzanp ak sipò pozitif.

Gwoup Aksyon Sekirite

Kounye a w gen tan etabli bon relasyon avèk sektè sekirite a, ni nan tèt ni nan baz yerachi a. Nan faz sa a ou pral konsantre sou jan pou w amelyore sèvis sipò ke gwoup sekirite a ap bay fanm k ap sibi vyolans.

Rekomandasyon pou Sipò

1. Òganize fòmasyon Sipò *SASA!* a ni pou lidè yo ni pou estaf k ap travay sou teren an.
2. Reyini avèk chèf sekirite yo. Rasanble enfòmasyon sou pwosedi ak règleman ki deja an plas yo e ki detèmine kouman yo dwe reyaji nan ka vyolans sou fanm.
3. Fè yon seminè avèk chèf ak ofisye yo pou analize pwèn fò ak pwèn fèb nan pwosedi ak règleman ki egziste pou reponn a ka vyolans sou fanm. Dokimante pwosesis la.

- 
- 
4. Travay avèk chèf ak ofisye yo pou ranfòse sèvis ak repons yo bay nan ka vyolans sou fanm.
 5. Sa ka mande revize pwosedi ak règleman yo oubyen kreye nouvo fòmilè entèvyou ak pwotokòl ki dwe respekte nan ka vyolans sou fanm. Chita avèk yo pandan y ap trete yon ka (si moun ki te sibi vyolans lan dakò), obsève kouman yo resevwa moun ki te sibi vyolans yo, ki pwosedi yo swiv pou trete ka a, ki konsèy yo bay. Bay fidbak ou yon fason ki konstrikatif pou w ede chèf yo amelyore jan yo resevwa moun ki te sibi vyolans yo.
 6. Kreye rankont fòmèl ak ajan yo (fòmasyon, semèn, atelye, elatriye) ansanm ak rankont enfòmèl tou (rankont a 2, obsève ansanm, devlope modèl, elatriye) ki pou kreye opotinite pou ranfòse kapasite ajan yo pou yo reponn yon fason apwopriye a ka vyolans sou fanm.
 7. Kreye yon sistèm referans ak gwoup la. Idantifye sèvis fòmèl ak enfòmèl ki deja egziste nan kominote a, pou yo kapab refere moun ki te sibi vyolans yo kote yo kapab jwenn plis sipò ankò. Sa enpòtan sitou pou ajan lapolis yo. Sonje, lapolis pa konsèye psikolojik, wòl yo se okipe ka yo selon lwa ki defini nan kad jistis peyi a.
 8. Òganize rankont ant ajan yo ak lòt sèvis nan kominote a ki ofri sipò pou chak gwoup kapab esplike kalite sèvis li bay ak pwosedi yo swiv nan ka vyolans sou fanm. Rankont sa yo ap pèmèt tou pou kontak pèsònèl vin etabli youn ak lòt kidonk y ap kapab pi byen refere youn ak lòt tou pi devan.

Gwoup Aksyon Pèsonèl Sante

Nan faz Sipò a, fòmasyon pou moun k ap travay nan domèn sante yo, mete aksan sou kalite swen ak sèvis yo bay fanm k ap sibi vyolans sou fanm ak VIH/SIDA.

Rekomandasyon pou Sipò

1. Òganize fòmasyon ak manyèl Fòmasyon Sipò *SASA!* a.
2. Fè yon seminè avèk lidè, ouvriye ak moun ki bay swen pou analize pwèn fò ak pwèn fèb nan pwosedi ak règleman ki egziste deja pou reponn a ka vyolans sou fanm nan klinik yo, lopital yo oubyen lòt kote yo bay swen yo. Dokimante pwosesis la.
3. Travay avèk lidè ak ouvriye yo pou yo ranfòse sèvis ak repons yo bay nan ka vyolans sou fanm. Sa ka mande revize pwosedi ak pwotokòl yo itilize nan fason yo resevwa epi okipe moun ki te sibi vyolans yo, pou sa yo kapab itilize oubyen adapte gid entèvyou *SASA!* yo.
4. Gade pou wè si Manyèl Fòmasyon Sèvis Sante *SASA!* a adapte a Gwoup Aksyon sante pa w la. Mennen sesyon yo si yo apwòpriye.
5. Vizite sèvis sante yo pou ankadre yo ak kore yo. Obsève kouman nouvo pwosedi oubyen règleman yo ap mache. Bay bon fidbak ak plis sipò kote yo bezwen li.
6. Ankouraje sèvis sante yo kontinye fè ti chita pale sou kesyon sante avèk moun ki te sibi vyolans k ap chèche sèvis ak sipò kominotè.
7. Kreye yon lis ki gen tout sèvis sipò kominote a, ki adrese a fanm k ap chèche plis sèvis sipò.

Gwoup Aksyon Relijye

Nan moman difisil, moun konn ale kote lidè relijye yo pou jwenn sipò ak konsèy. Ekip *SASA!* a kapab ede lidè relijye yo amelyore sipò yo bay fanm k ap sibi vyolans sou fanm ak VIH/SIDA, gason k ap fè vyolans sou fanm yo, oubyen fanm ak gason k ap eseye devlope pi bon relasyon nan viv ansanm ak kè kontan.

Rekomandasyon pou Sipò

1. Òganize fòmasyon ak manyèl Fòmasyon Sipò *SASA!* a.
2. Pase yon bon ti tan avèk lidè relijye yo ansanm ak fidèl yo. Obsève ki divès opòtinite lidè a genyen pou l kore fidèl yo. Pa egzanp nan konsèy pou fanm ak gason ki pral marye, konsèy nan moman kriz, nan vizit kay moun ki malad oubyen ki pral mouri, elatriye. Ede lidè yo idantifye opòtinite pou yo bay sipò.

3. Ansanm ak lidè yo, idantifye epi evalye règ yo swiv nan bay konsèy. Pa egzanp leson yo te aprann sou konsèy yo dwe bay moun avan yo marye, politik legliz la sou kesyon vyolans sou fanm ak pwoblèm nan fanmi yo, elatriye. Poze kesyon sou materyèl yo: Eske apwòch sa ede respè mityèl ak relasyon san fòs kote devlope? Eske li ranfòse prejije oubyen fèbles fanm yo? Eske li apwòpriye jounen jodi a lè nou konsidere pwoblèm vyolans sou fanm ak VIH/SIDA nan kominote nou yo?
4. Travay avèk lidè relijye yo pou revize oubyen ranfòse materyèl yo deja gen nan men yo.
5. Ankouraje lòt mwayen sipò anndan legliz la. Pa egzanp, si gen gwoup fanm, gwoup gason, gwoup sipò mityèl oubyen gwoup paran, gade kouman ou ka ranfòse kapasite yo pou kore manm yo. Sa ka mande fòmasyon, seminè, elatriye.

Gwoup Aksyon Lidè kominotè

Anpil nan lidè kominotè yo ka deja aktif nan kore fanm k ap sibi vyolans sou fanm ak VIH/SIDA. Gen lòt ki ka gen kòm responsab pou deside sou fòm ak kalite sèvis ki dwe disponib yo. Nan tou 2 ka sa yo, lidè kominotè yo enflyanse jan lòt manm yo bay priyorite sou kesyon vyolans sou fanm ak VIH/SIDA.

Rekomandasyon pou Sipò

1. Fè yon prezantasyon 'powerpoint' pou lidè w chwazi yo sou Sipò *SASA!* a.
2. Anime kèk sesyon nan Manyèl Fòmasyon Sipò ki apwòpriye yo.
3. Idantifye epi analize politik, règleman ak plan daksyon yo deja genyen. Eske yo kore dwa fanm genyen pou viv san vyolans?

4. Analize pwosesis lidè yo swiv pou pran desizyon (kilès, kouman epi ki lè desizyon yo pran). Brase lide avèk manm ekip *SASA!* a ak zanmi nan gwoup lidè ou te chwazi yo sou kouman ou ta ka enflyanse pwosesis yo deja genyen.
5. Ansanm ak lidè kominotè yo ak lòt aliyen w genyen, devlope yon plan pou ranfòse oubyen kreye nouvo politik/règleman/plan daksyon k ap kore balans pouvwa, sekirite ak dwa fanm.
6. Plede pou gen plis finansman oubyen plis atansyon sou repons ki dwe bay sou kesyon vyolans sou fanm ak VIH/SIDA ki makonnen avè l.

Gwoup Aksyon Biznis

Kit se nan sèktè fòmèl kit se nan sèktè enfòmèl, gen fason pou ranfòse kapasite mèt biznis ak sendika yo pou yo kore ouvriyèz ak anplwaye k ap sibi vyolans sou fanm ak VIH/SIDA.

Rekomandasyon pou Sipò

1. Òganize fòmasyon ak manyèl Fòmasyon Sipò *SASA/ a.*
2. Analize politik sendika oubyen konpayi a genyen sou kesyon vyolans sou fanm ak VIH/SIDA. Si pa gen yon politik etabli, ede yo devlope yon politik k ap kore ouvriyèz yo ki nan pwoblèm.
3. Plede pou yo entwodi yon politik sanksyon pou ouvriye k ap fè vyolans sou fanm. Ankouraje gwoup la adrese yon mesaj klè pou ouvriye ki fè vyolans sou fanm yo konprann sa pa akseptab ni nan travay yo, ni lakay yo.

4. Afiche oubyen distribye enfòmasyon sou sèvis fòmèl ak enfòmèl pou ouvriyèz k ap viv anba vyolans sou fanm ak VIH/SIDA. Ankouraje gwoup la bay fanm ki bezwen sèvis sa yo tan lib pou yo ta jwenn li.
5. Kore gwoup la pou tabli yon politik sou presyon seksyèl, si yo pa deja genyen l, ki pwoteje ouvriyèz yo kont fòm vyolans sa kote y ap travay la.
6. Ankouraje mete an plas yon sistèm sipò ouvriye ak ouvriyèz. Ekip *SASA/ a* kapab fè fòmasyon pou kèk ouvriyèz k ap vin jwe premye wòl nan repons ak prevansyon sou vyolans sou fanm.

Gwoup Aksyon Sitwayen

Nòmalmàn, zanmi, vwazen ak fanmi ki gen kontak regilye youn ak lòt byen okouran defi ak jwa ki nan lavi youn lòt. Poutan, pafwa ata pale yo pa pale sou kesyon vyolans sou fanm ak VIH/SIDA yo konn temwen nan vwazinaj yo. Ekip *SASA!* a kapab travay avèk Gwoup Aksyon Sitwayen yo pou ede yo kreye espas k ap ofri yo sekirite ak sipò pou yo kapab pale sou sa.

Rekomandasyon pou Sipò

1. Òganize fòmasyon ak manyèl Fòmasyon Sipò *SASA!* a pou lidè/repesantan gwoup sa yo (pou yo kapab retounen bay lòt manm yo menm fòmasyon an tou).
2. Pase yon bon ti tan avèk diferan gwoup yo. Ede yo idantifye nan ki sikonstans ak kouman yo kapab pote sipò bay manm yo. Fè yo sonje ke tout moun bezwen sipò, se pa sèlman fanm k ap sibi vyolans oubyen VIH/SIDA. Fanm, gason ak jèn k ap lite pou jwenn ekilib nan relasyon yo bezwen sipò tou, ansanm ak aktivis k ap pale sou kesyon sa yo nan kominote a tou.

3. Ede gwoup yo idantifye lòt sèvis fòmèl ak enfòmèl nan kominote a kote manm yo ka jwenn sipò epi kore lòt.
4. Anpil gwoup genyen yon konstitisyon oubyen règleman k ap gide yo sou kouman gwoup la dwe mache epi konpòtman manm yo dwe genyen. Gade dokiman sa epi korije l oubyen refè li nèt pou l gen deskripsyon sou konpòtman ki aksèptab nan kesyon pouvwa avèk vyolans sou fanm.
5. Travay avèk gwoup la pou yo devlope yon deklarasyon sou valè. Se yon deklarasyon sou sa gwoup la kwè ladan (pa egzanp, valè ak diyite tout moun, egalite fanm ak gason, balans pouvwa, elatriye). Lè sa fèt yon fason patisipatif, aktivite sa kapab sèvi pou defini prensip ak valè gwoup la epi gide manm yo nan dirèksyon gwoup la dwe pran pi devan. Etabli yon sistèm sipò pou manm ki gen bezwen. Pa egzanp, si yon jen santi l sou presyon pou l fè seks, yon fanm ap sibi vyolans, oubyen yon gason twouve li difisil pou l sispann sèvi ak vyolans, mete yon sistèm an plas kote manm yo ka mande epi jwenn sipò, swa nan men lòt manm gwoup la, swa an deyò gwoup la.
6. Mete diferan Gwoup Aksyon Sitwayen an kontak youn ak lòt. Ankouraje yo aprann youn sou lòt epi jwenn diferan fason youn ka kore efò lòt la. Ankouraje gwoup yo tabli yon fon ke manm yo kapab itilize lè yo gen gwo pwoblèm.

Si w bezwen plis ransèyman sou *SASA!*, kontakte nou: Repanse Pouvwa (509) 3617 1815 • annanpechevyolans@gmail.com • Beyond Borders (011) 202 686 2088 • www.beyondborders.net

Pou vèsyon orijinal *SASA!* ann Angle: www.raisingvoices.org/sasa

Tèks sa a, se yon adaptasyon vèsyon orijinal *SASA!* Raising Voices ak ilistrasyon atis Marco Tibasima.

Se yon ekip Repanse Pouvwa/Beyond Borders avèk atis Chevelin Pierre plis grafis EducaVision ki reyalize adaptasyon an pou Ayiti.



An n anpeche vyolans sou fanm ak enfeksyon VIH/SIDA